



Kamis, 17 Agustus 2023

Ogen : Pilipi 3:12-14



“Terus Melaju Untuk Indonesia

Maju”



"Merdeka...merdeka...merdeka..." wari enda wari kemerdekaan bangsata Republik Indonesia. Siperingati alu erbage-bage perayaan. Sipenangkih me bendera Merah-Putih ngataken bage me kegeluhen Indonesia nangkih ku ingan si meganjang segelah itatap entah iidah kalak sideban i bas ingan si ndauh nari pe. Tahun enda iajuk kerina bangsa Indonesia guna "Terus melaju untuk Indonesia maju." Enggo 78 tahun bangsata enda merdeka, enggo melala perkembangan si jadi, subuk pendidikan, infrastruktur bage pe ekonomi. I bas mperingati ulang tahun bangsata enda kai dage si jadi kado "hadiah" man bana.

Erlajar kita arah Paulus, si mereken dirina guna terus ipelimbarui ku siterulin. Igejapkenna maka dirina langa bo serta, e maka terus erpala-pala guna ndatken pemere si enggo isikapken Dibata arah lebena. E maka pinter ia kiam ku tujun. Kerina singolangi ia guna ndatken tujun pe ilupakenna. Ietehna maka pemere si enggo isikapken Dibata e ndauh ulin entah belinen asangkan kai si lit genduari. Erdandanken si e i bas dirina lit kinitutusen, dingan nggit erkorban guna ndatken pemere e.

Selaku bangsa Indonesia, meriah kel ukurta i bas kemerdekaan si enggo ibreken Dibata man banta, sirayaken me kemerdekaan enda alu erbage-bage cara. Cukup nge ndia terjeng perayaan? Lang. Kemerdekaan enda arus terus si isi alu erbage-bage si mehuli man bangsanta. Kita me nande, si nikapken generasi bangsa. Teruslah bangun karakter si ertanggung jawab guna kemajuan bangsa Indonesia alu ngajarken ras ncidahkan usihen man anak tengah jabu. Suanken karakter 'saling menerima,' ngasup ngaloken kinierbagen jadi sada gegeh kiniersadan. Pengarapenta tambah warina tambah ersadana kita guna Indonesia maju. Salam merdeka.

Nande si ertanggungjawab maba kemajun bangsa Indonesia

